



Broj/Broj: 01/a – 50 – 1 – 15 - 70/10
Sarajevo/Sarajevo: 21.1.2010.

ZAPISNIK
70. sjednice Predstavničkog doma
Parlamentarne skupštine Bosne i Hercegovine,
održane 21. 1. 2010. godine

Sjednica je počela u 10 sati. Prisustvovao je 41 poslanik.

Opravdano je odsustvovala Azra Alajbegović.

Iz Vijeća ministara BiH sjednici su prisustvovali ministar Sadik Ahmetović i zamjenici ministra Fuad Kasumović i Srđan Arnaut.

Iz međunarodnih organizacija sjednicu su pratili predstavnici OSCE-a i japanske ambasade.

Prije nego što se prešlo na raspravu o dnevnom redu, u okviru prethodnih pitanja, predsjedavajući Milorad Živković upoznao je Dom da je Centralna izborna komisija BiH, 15. 1. 2010. , dostavila Odluku o prestanku mandata preminulom poslaniku Jozi Križanoviću kao i Uvjerenje o dodjeli mandata gospođi Nermini Zaimović - Uzunović. Ova odluka postala je pravosnažna 30. 12. 2009. Naveo je i to da je Nermina Zaimović - Uzunović, 15. 1. 2010., potpisala izjavu o prihvatanju mandata, te je pozvao gospođu Nerminu Zaimović - Uzunović da da svečanu izjavu, što je ona i učinila.

Nakon što je kratko upoznao Dom sa izmjenama dnevnog reda, predsjedavajući je otvorio raspravu o dnevnom redu.

Denis Bećirović predložio je da se dnevni red sjednice dopuni tačkom: Razmatranje Informacije o sankcioniranju izvršilaca verbalnih i fizičkih nasrtaja na novinare u BiH, s posebnim osvrtom na prijedlog mjera s ciljem sprečavanja verbalnih i fizičkih prijetnji novinarima u Bosni i Hercegovini.

Predsjedavajući Živković rekao je da je za raspravu o toj tački potreban materijal Ministarstva sigurnosti BiH. Postignut je konsenzus da Kolegij Doma od Ministarstva sigurnosti BiH urgencijom zatraži realizaciju zaključaka Predstavničkog doma usvojenih na 55. sjednici, održanoj 10. juna 2009., a povodom rasprave o tački dnevnog reda koja glasi: Informacija Ministarstva sigurnosti BiH o stanju sigurnosti novinara u Bosni i Hercegovini (realizacija usvojenog zaključka sa 47. sjednice Doma, održane 4. marta 2009.), te da se nakon dobivanja informacije, ova tačka uvrsti u dnevni red sjednice Doma.

Predsjedavajući je konstatirao da 70. sjednica Predstavničkog doma ima sljedeći

DNEVNI RED

1. Usvajanje zapisnika 68. i 69. sjednice Predstavničkog doma;
2. Poslanička pitanja:
 - a) Komentari na dobivene odgovore,

- b) Nova poslanička pitanja;
3. Zahtjev Vijeća ministara BiH za razmatranje Prijedloga zakona o radnom vremenu, obaveznim odmorima mobilnih radnika i uređajima za evidentiranje u drumskom prijevozu po skraćenom postupku, u skladu s članom 126. Poslovnika,
 4. Prijedlog zakona o popisu stanovništva, domaćinstava i stanova u Bosni i Hercegovini 2011 godine, predlagač: Vijeće ministara BiH, zakon broj: 01, 02 – 02 – 9 – 78 /09, od 2. 9. 2009. (prvo čitanje);
 5. Prijedlog zakona o sprečavanju sukoba interesa u institucijama Bosne i Hercegovine, predlagač: Vijeće ministara BiH, zakon broj: 01, 02 – 02 – 9 – 122 /09, od 24. 12. 2009. godine (prvo čitanje);
 6. Prijedlog zakona o Sudskoj policiji Bosne i Hercegovine, predlagač: Vijeće ministara BiH, zakon broj: 01, 02, - 02 – 5 – 124 /09, od 31. 12. 2009. (prvo čitanje);
 7. Prijedlog zakona o izmjenama i dopunama Zakona o Javnom radiotelevizijskom sistemu Bosne i Hercegovine, predlagač: Vijeće ministara BiH, zakon broj: 01, 02 – 02 – 3 – 97/09, od 16. 10. 2009. (prvo čitanje);
 8. Prijedlog zakona o izmjenama i dopunama Zakona o Javnom radiotelevizijskom servisu Bosne i Hercegovine, predlagač: Vijeće ministara BiH, zakon broj: 01, 02 – 02 – 3 – 98/09, od 16. 10. 2009. (prvo čitanje);
 9. Prijedlog zakona o izmjenama i dopunama Zakona o komunikacijama, predlagač: Vijeće ministara BiH, zakon broj: 01, 02, - 02 – 3 – 99 /09, od 16. 10. 2009. (prvo čitanje);
 10. Prijedlog zakona o izmjenama i dopunama Zakona o klasifikaciji djelatnosti u Bosni i Hercegovini, predlagač: Vijeće ministara BiH, zakon broj: 01, 02 – 02 – 7 – 121 /09, od 23. 12. 2009. (prvo čitanje);
 11. Prijedlog zakona o dopuni Krivičnog zakona Bosne i Hercegovine, predlagač: poslanik Denis Bećirović, zakon broj: 01 – 02 – 5 – 100 /09, od 30. 10. 2009. (prvo čitanje);
 12. Prijedlog zakona o dopunama Zakona o Sudu Bosne i Hercegovine, predlagač: poslanik Azra Hadžiahmetović, zakon broj: 01 – 02 – 5 – 118 /09, od 15. 12. 2009. (prvo čitanje);
 13. Prijedlog zakona o izmjenama i dopunama Zakona o Tužilaštvu Bosne i Hercegovine, predlagač: poslanik Azra Hadžiahmetović, zakon broj: 01 – 02 – 5 – 119 /09, od 15. 12. 2009. (prvo čitanje);
 14. Prijedlog zakona o Ustavnom sudu Bosne i Hercegovine s Mišljenjem Ustavnopravne komisije, predlagač: poslanik Momčilo Novaković, zakon broj: 01, 02 – 02 – 5 – 93 /09, od 13. 10. 2009.;
 15. Prijedlog zakona o dopuni Zakona o reviziji institucija Bosne i Hercegovine, s Mišljenjem Komisije za finansije i budžet, predlagač: poslanik Momčilo Novaković, zakon broj: 01, 02, - 02 – 4 – 95 /09, od 13. 10. 2009.;
 16. Informacija o izdatim dozvolama za promet oružja, vojne opreme i proizvoda dvojne namjene u 2008. godini (podnosilac: Ministarstvo vanjske trgovine i ekonomskih odnosa BiH);
 17. Izvještaj komisije Kolegija o nastojanju za postizanje saglasnosti o prijedlogu zaključka poslanika Vinka Zorića sa 68. sjednice Doma, održane 30. 12. 2009., koji glasi: „Iz budžetske rezerve bit će izdvojeno 700.000. KM za vrhunske rezultate sportista. Sredstvima će raspolagati Ministarstvo civilnih poslova BiH, odnosno Vijeće ministara BiH, po jasno utvrđenim kriterijima a dobiti ih mogu savezi registrirani na nivou Bosne i Hercegovine čije su reprezentacije postigle uspjehe na međunarodnim takmičenjima. Sredstva se dodjeljuju tokom godine kad bude ostvaren dobar rezultat. Isto tako, Ministarstvo može podržati međunarodna takmičenja na nivou reprezentacija“,

18. Izvještaj komisije Kolegija o prijedlogu zaključka poslanika Kluba SDA sa 69. sjednice Doma, održane 30. 12. 2009., koji glasi: „Zadužuje se Vijeće ministara BiH da, bez odgađanja, utvrdi i u parlamentarnu proceduru uputi prijedlog zakonskog rješenja kojim se na nedvosmislen način kao krivično djelo sankcionira svako poricanje, umanjenje ili odobravanje zločina holokausta, genocida ili drugih zločina protiv čovječnosti. Prijedlogom je neophodno obuhvatiti ispunjavanje svih obaveza koji BiH ima na osnovu: Rezolucije Generalne skupštine UN-a o negiranju holokausta od 26.1.2007., Dodatnog protokola na Konvenciju o kibernetičkom kriminalu i kriminalizaciji djela rasističke i ksenofobične prirode počinjenih pomoću kompjuterskih sredstava, Konvencije o sprečavanju i kažnjavanju zločina genocida te Konvencije o ukidanju svih oblika rasne diskriminacije. Prijedlogom je također neophodno obuhvatiti dobru praksu demokratskih zemalja svijeta po ovom pitanju kao i obaveze BiH po svim drugim međunarodnim pravnim aktima.“,
19. Donošenje zaključka o izdvajanju jednodnevne zarade poslanika u Predstavničkom domu iz mjeseca januara za pomoć građanima Haitija;
20. Donošenje zaključaka o izdvajanju finansijskih sredstava za ublažavanje posljedica i otklanjanje šteta nastalih od poplava tokom mjeseca januara 2010.godine na teritoriji BiH;
21. Izmjene u članstvu komisije Predstavničkog doma i zajedničke komisije oba doma:
 - a) Lejla Klokić imenuje se za člana Zajedničke komisije za ljudska prava, prava djeteta, mlade, imigraciju, izbjeglice, azil i etiku i Komisije za vanjske poslove Predstavničkog doma, umjesto Sadika Ahmetovića kojem je prestao mandat imenovanjem na dužnost ministra sigurnosti BiH i zamjenika predsjedavajućeg Vijeća ministara BiH,
22. Davanje saglasnosti za ratifikaciju:
 - a) Sporazuma između Vijeća ministara Bosne i Hercegovine i Vlade Savezne Republike Njemačke o finansijskoj saradnji u 2008. godini,
 - b) Revidiranog dopunskog sporazuma o pružanju tehničke pomoći od strane Međunarodne organizacije za atomsku energiju (IAEA) Bosni i Hercegovini,
 - c) Šestog dodatnog protokola na Ustav Svjetskog poštanskog saveza.

Ad.1. Usvajanje zapisnika 68. i 69. sjednice Predstavničkog doma

Nije bilo rasprave o zapisnicima.

Zapisnik 68. sjednice usvojen je s 32 glasa „za“ (iz Federacije BiH 19, iz Republike Srpske 13), jednim „protiv“ i jednim „suzdržanim“ glasom.

Zapisnik 69. sjednice usvojen je s 32 glasa „za“ (iz Federacije BiH 20, iz Republike Srpske 12), bez glasova „protiv“ i dva „suzdržana“ glasa.

Ad.2. Poslanička pitanja

Predsjedavajući Živković konstatirao je da su od prošle do ove sjednice odgovore na pitanja dobili:

1. Adem Huskić – od Zajedničke službe, na pitanje postavljeno na 64. sjednici i Vijeća ministara BiH, na pitanje postavljeno na 59. sjednici
2. Rifat Dolić - od Vijeća ministara BiH, na pitanja postavljena na 56., 60. i 62. sjednici i Ministarstva odbrane BiH, na pitanje postavljeno na 64. sjednici,
3. Azra Alajbegović - od Vijeća ministara BiH, na pitanja postavljena na 21., 45. i 62. sjednici i Ministarstva obrazovanja i nauke Kantona Sarajevo, na pitanje postavljeno na 50. sjednici (a po urgenciji Doma sa 61. sjednice)
4. Lazar Prodanović - od Vijeća ministara BiH, na pitanja postavljena na 52. i 59. sjednici

5. Mirko Okolić - od Vijeća ministara BiH, na pitanje postavljeno na 60. sjednici
6. Vesna Šain – od Direkcije za ekonomsko planiranje, na pitanje postavljeno na 69. sjednici
7. Milorad Živković – od Ministarstva vanjskih poslova BiH i RAK-a, na pitanja postavljena na 66. sjednici
8. Šemsudin Mehmedović - od Vijeća ministara BiH, na pitanje postavljeno na 59. sjednici (a po urgenciji Doma sa 61. sjednice) i RAK-a, na pitanje postavljeno na 66. sjednici
9. Martin Raguž - od Vijeća ministara BiH, na pitanje postavljeno na 63. sjednici (dva odgovora)
10. Sead Jamakosmanović - od Vijeća ministara BiH, na pitanje postavljeno na 26. sjednici
11. Šefik Džaferović - od Vijeća ministara BiH, na pitanje postavljeno na 28. sjednici
12. Velimir Jukić - od Vijeća ministara BiH, na pitanje postavljeno na 30. sjednici
13. Vinko Zorić - od Vijeća ministara BiH, na pitanje postavljeno na 26. sjednici
14. Mehmed Suljkanović - od Vijeća ministara BiH, na inicijativu upućenu na 30. sjednici
15. Remzija Kadrić - od Vijeća ministara BiH, na pitanje postavljeno na 66. sjednici
16. Selim Bešlić - od Vijeća ministara BiH, na pitanje postavljeno na 63. sjednici
17. Denis Bećirović - od Vijeća ministara BiH, na pitanja postavljena na 35. i 62. sjednici
18. Mirjana Malić - od Vijeća ministara BiH, na pitanje postavljeno na 62. sjednici
19. Sadik Bahtić - od Vijeća ministara BiH, na pitanje postavljeno na 23. sjednici
20. Husein Nanić – od Ministarstva vanjskih poslova BiH, na pitanje postavljeno na 66. sjednici.

Odgovore su komentirali: Adem Huskić, Martin Raguž, Sadik Bahtić, Husein Nanić, Mirjana Malić, Lazar Prodanović, Mehmed Suljkanović, Remzija Kadrić, Velimir Jukić i Milorad Živković.

U okviru komentara na dobivene odgovore, ranija pitanja su ponovljena, odnosno dopunjena sljedećim:

Martin Raguž:

"Kada će Vijeće ministara BiH dostaviti Parlamentarnoj skupštini BiH Prijedlog revidirane strategije za provođenje Aneksa VII. Dejtonskog mirovnog sporazuma?"

Sadik Bahtić:

"Tražim od Vijeća ministara BiH da mi odgovori da li je tačno da je poslanik Zlatko Lagumdžija dao ovlaštenje u ratu da se prikupljaju sredstva po Zapadu i Evropi, da li postoji taj pečat i ta ovlaštenja i koliko je novca prikupljeno na račun države BiH?"

Milorad Živković:

„Koliko je sklopljeno bilateralnih ugovora o dvojnog državljanstvu, s kojim zemljama i da li postoji plan o zaključivanju novih u narednom periodu?“

Postavljena su nova poslanička pitanja kako slijedi:

Slavko Matić:

"Koje mjere i aktivnosti je preduzelo ili će preduzeti Ministarstvo odbrane BiH kako bi koliko - toliko pomoglo u zbrinjavanju lica koja se ove godine otpuštaju iz Oružanih snaga BiH, a radi zakonske odredbe o starosnoj dobi?"

Šefik Džaferović

1. "Šta preduzima Vijeće ministara BiH kako bi se u Bosni i Hercegovini pristupilo sinhroniziranoj aktivnosti na odlaganju i uništavanju tvrdog otpada (smeća), kako bi se konačno počela štititi životna sredina u BiH? Da li Vijeće ministara BiH planira pokrenuti širu akciju na čišćenju vodotoka nakon posljednjih poplava u BiH?"

2. Pitanje čuvanja, zaštite i upravljanja privremeno oduzetim robama u odgovarajućim postupcima u BiH nije na odgovarajući način riješeno, zbog toga mnoge od ovih roba propadaju, a država ili plaća štetu ili plaća njihovo uništenje. Da li i šta preduzima Vijeće ministara BiH kako bi se ovim robama gazdovalo na najbolji način dok se nalaze u režimu privremeno oduzetih? "

Niko Lozančić

"Zašto Vijeće ministara BiH do danas nije ispunilo svoju zakonsku obavezu davanja saglasnosti na Pravilnik o unutrašnjoj organizaciji Agencije za lijekove i medicinska sredstva BiH i kada će konačno tu saglasnost dati?"

Momčilo Novaković

1. "Kakav je stav Predsjedništva BiH u odnosu na izjavu predsjednika Republike Hrvatske, a koja se odnosi na slanje hrvatske vojske u BiH u slučaju raspisivanja referendumu u Republici Srpskoj?"

2. Da li će u 2010. godini biti odobravane kvote na uvoz šećera u BiH i ako hoće, na koji način? Koji su efekti ranije donesenih izmjena vezanih za uvoz šećera?"

Martin Raguž:

1. "Šta je učinjeno na realizaciji zaključaka Predstavničkog doma PSBiH, usvojenih 9.7.2009., vezanih za poplave u Popovom polju, rijeci Krupi, Hutovom blatu, te da li su i kakve učinke postigli?"

2. Kako teče realizacija projekta upravljanja Neretvom i Trebišnjicom (projekat finansiran sredstvima Svjetske banke u iznosu od 8 miliona dolara, od toga 6 miliona dolara za Bosnu i Hercegovinu a 2 miliona dolara za Hrvatsku) – projekat za učinkovitu i nepristrasnu raspodjelu vode među korisnicima u bazenu Neretve i Trebišnjice?"

Sadik Bahtić:

"Da li su pregovori entitetskih vlada o zaduženju, za koje sam saznao putem medija, usaglašeni na nivou države BiH i u skladu s procedurama o zaključivanju međunarodnih ugovora?"

Adem Huskić:

"Kada će Vijeće ministara BiH prestati kršiti odredbe Sporazuma o stabilizaciji i pridruživanju i zaključke ovog doma u pogledu administrativnih zabrana za uvoz putničkih i teretnih automobila i autobusa iz zemalja EU, pravdajući to izmišljenim razlozima kao što je nepostojanje ovlaštene kuće za homologaciju, jer se ona ni sada ne vrši?"

Nermina Zaimović-Uzunović:

"U medijima su se pojavile informacije da je za potrebe Službenog lista BiH kupljen poslovni prostor u zgradi na Otoci u Sarajevu. Također se navodi da je kvadratni metar plaćen po veoma visokoj cijeni. Shodno tome, želim da postavim sljedeće poslaničko pitanje – Ko je odobrio kupovinu kancelarijskog prostora za navedene namjene, da li je procedura provedena na zakonit način i koliko je stvarno plaćen poslovni prostor?"

Lazar Prodanović:

"Šta je Ministarstvo, tj. nadležno diplomatsko - konzularno predstavništvo BiH preduzelo po pitanju rješavanja problema zdravstvenih radnika iz BiH upućenih na privremeni rad u Libiju posredstvom različitih agencija?"

Remzija Kadrić:

"U vezi s određenim inicijativama, prema mojim saznanjima, o raspisivanju tendera za nabavku devet hiljada računara u vrijednosti od oko 9 miliona KM, a za potrebe određenih institucija, postavljam pitanje – Da li je potreba nabavke računara analizirana u nadležnim institucijama, iz kojih bi se sredstava finansirala pomenuta nabavka i ko će biti nosilac posla a ko posrednik u tom poslu?"

Mehmed Suljkanović:

"Kada će biti donesen pravilnik kojim se regulira uništavanje zaplijenjenih opojnih droga?"

Husein Nanić:

"S obzirom da u Budžetu institucija BiH za 2010. godinu a i za 2009. godinu nisu planirana sredstva za deminiranje, ostaje nejasno iz kojih sredstava se inače vrši deminiranje u BiH. Stoga postavljam pitanje i tražim informaciju o prikupljenim i utrošenim sredstvima za deminiranje u 2009.godini, kao i o planovima za 2010.godinu, s popisom izvora i iznosa tih sredstava."

Rifat Dolić:

1. "Ko je poimenično u posljednje dvije godine, zaključno s 20.1.2010., na bihaćkom univerzitetu dobio izbor u zvanja docent, vanredni profesor, profesor i emeritus? Koliko dugo su prije toga izbornici nosili prethodno zvanje i koje godine i gdje su odbranili doktorsku disertaciju?"

2. Kakvi su planovi BiH i kako stoje prioriteti za otvaranje ambasade BiH u Alžiru, s obzirom na činjenicu da se radi o zemlji s blizu 40 miliona stanovnika, sa značajnim ekonomskim potencijalima, koja je bila tradicionalno tržište u vrijeme zajedničke države i koja danas može biti značajan ekonomski partner BiH?"

Željko Kuzmanović:

1. "Molim Vijeće ministara BiH i nadležnu agenciju da mi dostave popis stanovništva BiH iz 1991. godine zbirno po svim kategorijama i po svakoj općini pojedinačno."

2. Molim RAK da mi dostavi informaciju šta je urađeno s viškom prihoda RAK-a koji je trebalo da bude usmjeren u proces digitalizacije javnih RTV emitera?"

Ad.3. Zahtjev Vijeća ministara BiH za razmatranje Prijedloga zakona o radnom vremenu, obaveznim odmorima mobilnih radnika i uređajima za evidentiranje u drumskom prijevozu po skraćenom postupku, u skladu s članom 126. Poslovnika

Nakon uvodnih napomena predsjedavajućeg Živkovića, u raspravi su učestvovali: Beriz Belkić, Husein Nanić, Branko Dokić i ministar Rudo Vidović.

Dom je, s 34 glasa „za“ (iz Federacije BiH 20, iz Republike Srpske 14), bez glasova „protiv“ i jednim „suzdržanim“ glasom, usvojio zahtjev Vijeća ministara BiH za razmatranje Prijedloga zakona po skraćenom postupku, u skladu s članom 126. Poslovnika.

Ad.4. Prijedlog zakona o popisu stanovništva, domaćinstava i stanova u Bosni i Hercegovini 2011 godine, predlagač: Vijeće ministara BiH, zakon broj: 01, 02 – 02 – 9 – 78 /09, od 2. 9. 2009. (prvo čitanje)

Predsjedavajući je dao uvodne napomene. U dužoj raspravi su učestvovali: Šefik Džaferović, Milorad Živković, Momčilo Novaković, Beriz Belkić, Remzija Kadrić, Mirko Okolić, Drago Kalabić, Lazar Prodanović, Salko Sokolović, Adem Huskić, Martin Raguž, Milica Marković, Vinko Zorić, Sefer Halilović, Bakir Izetbegović, Azra Hadžiahmetović, Denis Bećirović, Rifat Dolić, Halid Genjac, Vesna Šain, Ekrem Ajanović, Zlatko Lagumdžija, Savo Erić, Sadik Bahtić i Velimir Jukić.

U okviru ove tačke dnevnog reda, Bakir Izetbegović predložio je sljedeće zaključke:

1. Odgađa se izjašnjavanje o Prijedlogu zakona o popisu stanovništva, domaćinstava i stanova u Bosni i Hercegovini 2011. godine u prvom čitanju.
2. Predstavnički dom imenuje Ad hoc komisiju sastavljenu od po jednog poslanika iz svakog kluba poslanika u Predstavničkom domu.
Komisija će u roku od 10 dana:
 - usaglasiti odredbe zakona koje osiguravaju da se popisom obuhvate izbjeglice i raseljena lica, odnosno svi državljani BiH,
 - usaglasiti odredbu zakona kojom se rezultati popisa primjenjuju nakon općih izbora 2014.godine,
 - usglasiti ostala sporna rješenja u Prijedlogu zakona,
 - na precizan i jasan način definirati obavezu, dinamiku i način izvršavanja obaveze Vijeća ministara BiH da za povratak osigura dodatna sredstva od oko 500 miliona KM za povratak do sredine tekuće godine.
3. Nakon što Komisija okonča posao i podnese izvještaj, Predstavnički dom izjasnit će se o Prijedlogu zakona o popisu stanovništva, domaćinstava i stanova u prvom čitanju.

Dom se prvo izjašnjavao o zaključku pod brojem 1. S 12 glasova „za“ (iz Federacije BiH 11, iz Republike Srpske jedan), 18 glasova „protiv“ i pet „suzdržanih“ glasova, Dom nije usvojio zaključak. O ostalim zaključcima nije se glasalo.

Zatim je Dom odbio Prijedlog zakona u prvom čitanju s 16 glasova „za“ (iz Federacije BiH 4, iz Republike Srpske 12), 19 glasova „protiv“ (iz Federacije BiH 17, iz Republike Srpske dva) i bez „suzdržanih“ glasova.

Ad.5. Prijedlog zakona o sprečavanju sukoba interesa u institucijama Bosne i Hercegovine, predlagač: Vijeće ministara BiH, zakon broj: 01, 02 – 02 – 9 – 122 /09, od 24. 12. 2009. (prvo čitanje)

U raspravi su, nakon uvodnih napomena, učestvovali: Šefik Džaferović, Halid Genjac, Milorad Živković, Azra Hadžiahmetović, Momčilo Novaković, Beriz Belkić, Ekrem Ajanović, Remzija Kadrić, Mirko Okolić, Bakir Izetbegović, Niko Lozančić, Slavko Jovičić, Lazar Prodanović, Selim Bešliagić, Velimir Jukić, Martin Raguž i zamjenik ministra Srđan Arnaut.

U okviru ove tačke dnevnog reda zaključke su predložili: Halid Genjac, Azra Hadžiahmetović, Momčilo Novaković i Mirko Okolić.

Dom se prvo izjašnjavao o predloženim zaključcima.
Zaključci Halida Genjca glase:

1. Odgađa se izjašnjavanje o Prijedlogu zakona o sprečavanju sukoba interesa u institucijama Bosne i Hercegovine u prvom čitanju.
2. Kolegij Predstavničkog doma zatražit će mišljenje Venecijanske komisije o predloženom zakonu.
3. Nakon dobivenog mišljenja Venecijanske komisije, Predstavnički dom izjasnit će se o Prijedlogu zakona u prvom čitanju.

"Za" zaključke Halida Genjca glasalo je 16 poslanika (iz Federacije BiH 14, iz Republike Srpske dva), „protiv“ je glasalo 12 a pet poslanika bilo je „suzdržano“. Predsjedavajući je konstatirao da nema potrebne entitetske većine, pa se Kolegij odmah pokušao usaglasiti. Kako saglasnost nije postignuta, u drugom krugu glasanja, s 15 glasova „za“ (iz Federacije BiH 13, iz Republike Srpske dva), 13 glasova „protiv“ (iz Federacije BiH jedan, iz Republike Srpske 12) i šest „suzdržanih“ glasova, Dom nije usvojio zaključke.

Zatim se prešlo na glasanje o zaključku Azre Hadžiahmetović koji glasi:

„Izjašnjavanje o Prijedlogu zakona o sprečavanju sukoba interesa u institucijama Bosne i Hercegovine odgađa se do dobivanja mišljenja Venecijanske komisije o predloženom zakonu (u skladu sa sugestijom Vijeća ministara BiH).“

„Za“ zaključak Azre Hadžiahmetović glasalo je 18 poslanika (iz Federacije BiH 16, iz Republike Srpske dva), „protiv“ je glasalo 12 a pet poslanika bilo je „suzdržano“. Predsjedavajući je konstatirao da nema potrebne entitetske većine, pa se Kolegij odmah pokušao usaglasiti. Kako saglasnost nije postignuta, u drugom krugu glasanja, s 18 glasova „za“ (iz Federacije BiH 16, iz Republike Srpske dva), 12 glasova „protiv“ (iz Republike Srpske) i četiri „suzdržana“ glasa, Dom nije usvojio zaključak.

Na kraju je Dom, sa 17 glasova „za“ (iz Federacije BiH šest, iz Republike Srpske 11), 17 glasova „protiv“ i jednim „suzdržanim“ glasom, odbio Prijedlog zakona o sprečavanju sukoba interesa u institucijama Bosne i Hercegovine u prvom čitanju.

S obzirom da je Zakon odbijen, Dom se nije izjašnjavao ostalim predloženim zaključcima.

Ad.6. Prijedlog zakona o Sudskoj policiji Bosne i Hercegovine, predlagač: Vijeće ministara BiH, zakon broj: 01, 02, - 02 – 5 – 124 /09, od 31. 12. 2009. (prvo čitanje)

Predsjedavajući je dao kratke uvodne napomene. U raspravi su učestvovali: Vesna Šain, Remzija Kadrić, Šefik Džaferović, Milorad Živković, Drago Kalabić, Azra Hadžiahmetović, Mirko Okolić, Slavko Jovičić, Niko Lozančić i zamjenik ministra Srđan Arnaut.

„Za“ Prijedlog zakona glasala su 22 poslanika (iz Federacije BiH 20, iz Republike Srpske dva), 10 poslanika glasalo je „protiv“ i tri su bila „suzdržana“. Predsjedavajući je konstatirao da nema potrebne entitetske većine, pa se Kolegij odmah pokušao usaglasiti. Kako saglasnost nije postignuta, u drugom krugu glasanja, s 22 glasa „za“ (iz Federacije BiH 20, iz Republike Srpske dva), 12 glasova „protiv“ (iz Republike Srpske) i jednim „suzdržanim“ glasom, Dom je odbio Prijedlog zakona o Sudskoj policiji Bosne i Hercegovine u prvom čitanju.

Ad.7., 8. i 9.

Predsjedavajući je dao kratke uvodne napomene, nakon čega je Slavko Matić, u ime Komisije za saobraćaj i komunikacije, predložio da se vodi jedinstvena rasprava o Prijedlogu

zakona o izmjenama i dopunama Zakona o Javnom radiotelevizijskom sistemu BiH, Prijedlogu zakona o izmjenama i dopunama Zakona o Javnom radiotelevizijskom servisu BiH i Prijedlogu zakona o izmjenama i dopunama Zakona o komunikacijama. Kako niko nije bio protiv, otvorena je rasprava o navedenim zakonima.

U raspravi su učestvovali: Slavko Matić, Branko Dokić, Momčilo Novaković, Mirjana Malić, Azra Hadžiahmetović, Mirko Okolić i Denis Bećirović.

Dom je, s 29 glasova „za“ (iz Federacije BiH 18, iz Republike Srpske 11), tri glasa „protiv“ i dva „suzdržana“ glasa, usvojio Prijedlog zakona o izmjenama i dopunama Zakona o Javnom radiotelevizijskom sistemu BiH u prvom čitanju.

Dom je, s 30 glasova „za“ (iz Federacije BiH 19, iz Republike Srpske 11), tri glasa „protiv“ i dva „suzdržana“ glasa, usvojio Prijedlog zakona o izmjenama i dopunama Zakona o Javnom radiotelevizijskom servisu BiH u prvom čitanju.

I na kraju je Dom, s 30 glasova „za“ (iz Federacije BiH 19, iz Republike Srpske 11), tri glasa „protiv“ i dva „suzdržana“ glasa, usvojio Prijedlog zakona o izmjenama i dopunama Zakona o komunikacijama u prvom čitanju.

Ad.10. Prijedlog zakona o izmjenama i dopunama Zakona o klasifikaciji djelatnosti u Bosni i Hercegovini, predlagač: Vijeće ministara BiH, zakon broj: 01, 02 – 02 – 7 – 121 /09, od 23. 12. 2009. (prvo čitanje)

Drugi zamjenik predsjedavajućeg Beriz Belkić dao je kratke uvodne napomene, nakon čega nije bilo rasprave u okviru ove tačke dnevnog reda.

Dom je, s 28 glasova „za“ (iz Federacije BiH 17, iz Republike Srpske 11), dva glasa „protiv“ i pet „suzdržanih“ glasova, usvojio Prijedlog zakona o izmjenama i dopunama Zakona o klasifikaciji djelatnosti u Bosni i Hercegovini u prvom čitanju.

Ad.11. Prijedlog zakona o dopuni Krivičnog zakona Bosne i Hercegovine, predlagač: poslanik Denis Bećirović, zakon broj: 01 – 02 – 5 – 100 /09, od 30. 10. 2009. (prvo čitanje)

Beriz Belkić dao je uvodne napomene, nakon čega su u raspravi učestvovali: Mirjana Malić, Drago Kalabić, Momčilo Novaković, Denis Bećirović, Adem Huskić, Slavko Jovičić, Remzija Kadrić, Velimir Jukić, Martin Raguž, Selim Bešlić, Milorad Živković, Beriz Belkić, Milica Marković, Mirko Okolić i Branko Dokić.

„Za“ Prijedlog zakona glasalo je 20 poslanika (iz Federacije BiH 17, iz Republike Srpske tri), jedan je glasao „protiv“ i 13 poslanika bilo je „suzdržano“. Predsjedavajući je konstatirao da nema potrebne entitetske većine, pa se će se Kolegij kao komisija pokušati usaglasiti u roku od tri dana i o tome obavijestiti Dom.

Ad.12. Prijedlog zakona o dopunama Zakona o Sudu Bosne i Hercegovine, predlagač: poslanik Azra Hadžiahmetović, zakon broj: 01 – 02 – 5 – 118 /09, od 15. 12. 2009. (prvo čitanje)

Predsjedavajući Milorad Živković dao je uvodne napomene, nakon čega su u raspravi učestvovali: Remzija Kadrić, Slavko Jovičić, Branko Dokić, Beriz Belkić, Denis Bećirović, Azra Hadžiahmetović, Momčilo Novaković i Milorad Živković.

„Za“ Prijedlog zakona glasalo je 19 poslanika (iz Federacije BiH 17, iz Republike Srpske dva), 15 poslanika glasalo je „protiv“ i jedan je bio „suzdržan“. Predsjedavajući je konstatirao da nema potrebne entitetske većine, pa se Kolegij odmah pokušao usaglasiti. Kako saglasnost nije postignuta, u drugom krugu glasanja s 19 glasova „za“ (iz Federacije

BiH 17, iz Republike Srpske dva), 15 glasova „protiv“ (iz Federacije BiH tri, iz Republike Srpske 12) i jednim „suzdržanim“ glasom, Dom je odbio Prijedlog zakona o Sudu Bosne i Hercegovine u prvom čitanju.

Ad.13. Prijedlog zakona o izmjenama i dopunama Zakona o Tužilaštvu Bosne i Hercegovine, predlagač: poslanik Azra Hadžiahmetović, zakon broj: 01 – 02 – 5 – 119 /09, od 15. 12. 2009. (prvo čitanje)

Predsjedavajući Milorad Živković dao je uvodne napomene, nakon čega nije bilo rasprave.

„Za“ Prijedlog zakona glasalo je 19 poslanika (iz Federacije BiH 17, iz Republike Srpske dva), 15 poslanika glasalo je „protiv“ i jedan je bio „suzdržan“. Predsjedavajući je konstatirao da nema potrebne entitetske većine, pa se Kolegij odmah pokušao usaglasiti. Kako saglasnost nije postignuta, u drugom krugu glasanja, s 19 glasova „za“ (iz Federacije BiH 17, iz Republike Srpske dva), 15 glasova „protiv“ (iz Federacije BiH tri, iz Republike Srpske 12) i jednim „suzdržanim“ glasom, Dom je odbio Prijedlog zakona o Tužilaštvu Bosne i Hercegovine u prvom čitanju.

Ad.14. Prijedlog zakona o Ustavnom sudu Bosne i Hercegovine s Mišljenjem Ustavnopravne komisije, predlagač: poslanik Momčilo Novaković, zakon broj: 01, 02 – 02 – 5 – 93 /09, od 13. 10. 2009.

Nakon uvodnih napomena predsjedavajućeg, nije bilo rasprave u okviru ove tačke dnevnog reda.

„Za“ negativno Mišljenje Ustavnopravne komisije glasala su 23 poslanika (iz Federacije BiH 21, iz Republike Srpske dva), tri poslanika bila su „protiv“ a devet je bilo „suzdržanih“. Predsjedavajući je konstatirao da nema potrebne entitetske većine, pa se Kolegij odmah pokušao usaglasiti. Kako saglasnost nije postignuta, u drugom krugu glasanja s 22 glasa „za“ (iz Federacije BiH 20, iz Republike Srpske dva), četiri glasa „protiv“ (iz Republike Srpske) i sedam „suzdržanih“ glasova, Dom je prihvatio Mišljenje Komisije te je Prijedlog zakona o Ustavnom sudu Bosne i Hercegovine odbijen u prvom čitanju.

Ad.15. Prijedlog zakona o dopuni Zakona o reviziji institucija Bosne i Hercegovine, s Mišljenjem Komisije za finansije i budžet, predlagač: poslanik Momčilo Novaković, zakon broj: 01, 02, - 02 – 4 – 95 /09, od 13. 10. 2009.

Nije bilo rasprave u okviru ove tačke dnevnog reda, nakon uvodnih napomena Milorada Živkovića.

Dom je, s 27 glasova „za“ (iz Federacije BiH 20, iz Republike Srpske sedam), dva glasa „protiv“ i šest „suzdržanih“ glasova, prihvatio Mišljenje Komisije te je Prijedlog zakona odbijen u prvom čitanju.

Ad.16. Informacija o izdatim dozvolama za promet oružja, vojne opreme i proizvoda dvojne namjene u 2008. godini (podnosilac: Ministarstvo vanjske trgovine i ekonomskih odnosa BiH)

Predsjedavajući je dao uvodne napomene, te između ostalog napomenuo da je u Mišljenju Zajedničke komisije za odbranu i sigurnost BiH usvojen zaključak koji glasi:

„Primanje Informacije k znanju ne znači istovremeno i proces potpune demokratske kontrole uvoza i izvoza oružja i vojne opreme, te se od nadležnog Ministarstva zahtijeva da:

- a) postupa u skladu sa zakonskim odredbama koje reguliraju pitanje prometa oružja i vojne opreme i u utvrđenim rokovima izvještava Parlamentarnu skupštinu BiH o prometu oružja i vojne opreme,
- b) uz Informaciju o izdatim dozvolama za promet oružja, vojne opreme i proizvoda dvojne namjene dostavlja i podatke o stvarno realiziranom izvozu/uvozu oružja, vojne opreme i proizvoda dvojne namjene po izdatim dozvolama, kao i odbijenim zahtjevima za izdavanje dozvola.“

U rapravi je učestvovala Azra Hadžiahmetović.

Dom je, s 28 glasova „za“ (iz Federacije BiH 17, iz Republike Srpske 11), dva glasa „protiv“ i četiri „suzdržana“ glasa, primio k znanju Informaciju i usvojio Mišljenje Komisije sa zaključkom.

Ad.17. Izvještaj komisije Kolegija o nastojanju za postizanje saglasnosti o prijedlogu zaključka poslanika Vinka Zorića sa 68. sjednice Doma, održane 30. 12. 2009., koji glasi: „Iz budžetske rezerve bit će izdvojeno 700.000. KM za vrhunske rezultate sportista. Sredstvima će raspolagati Ministarstvo civilnih poslova BiH, odnosno Vijeće ministara BiH, po jasno utvrđenim kriterijima a dobiti ih mogu savezi registrirani na nivou Bosne i Hercegovine čije su reprezentacije postigle uspjehe na međunarodnim takmičenjima. Sredstva se dodjeljuju tokom godine kad bude ostvaren dobar rezultat. Isto tako, Ministarstvo može podržati međunarodna takmičenja na nivou reprezentacija“

Nakon uvodnih napomena predsjedavajućeg, nije bilo rasprave u okviru ove tačke dnevnog reda.

Mješoviti klub poslanika narodnih stranaka predložio je da se odgodi glasanje o prijedlogu zaključka poslanika Vinka Zorića sa 68. sjednice Doma, održane 30. 12. 2009. Dom je, s 23 glasa „za“ (iz Federacije BiH 12, iz Republike Srpske 11), sedam glasova „protiv“ i tri „suzdržana“ glasa, prihvatio ovaj prijedlog.

Zatim se Dom izjašnjavao o zaključku Milorada Živkovića koji glasi:

„Zadužuje Kolegij Predstavničkog doma da s predlagačem zaključka ustanovi razloge zbog čega je odgođeno glasanje.“

Dom je, s 29 glasova „za“ (iz Federacije BiH 17, iz Republike Srpske 12), jednim glasom „protiv“ i jednim „suzdržanim“ glasom, usvojio navedeni zaključak.

Ad.18. Izvještaj komisije Kolegija o prijedlogu zaključka Kluba poslanika SDA sa 69. sjednice Doma, održane 30. 12. 2009., koji glasi: „Zadužuje se Vijeće ministara BiH da, bez odgađanja, utvrdi i u parlamentarnu proceduru uputi prijedlog zakonskog rješenja kojim se na nedvosmislen način kao krivično djelo sankcionira svako poricanje, umanjeње ili odobravanje zločina holokausta, genocida ili drugih zločina protiv čovječnosti. Prijedlogom je neophodno obuhvatiti ispunjavanje svih obaveza koje BiH ima na osnovu: Rezolucije Generalne skupštine UN-a o negiranju holokausta od 26.1.2007., Dodatnog protokola na Konvenciju o kibernetičkom kriminalu i kriminalizaciji djela rasističke i ksenofobične prirode počinjenih pomoću kompjuterskih sredstava, Konvencije o sprečavanju i kažnjavanju zločina genocida te Konvencije o ukidanju svih oblika rasne diskriminacije. Prijedlogom je također neophodno obuhvatiti dobru praksu demokratskih zemalja svijeta po ovom pitanju kao i obaveze BiH po svim drugim međunarodnim pravnim aktima.“

Nakon uvodnih napomena predsjedavajućeg Živkovića, nije bilo rasprave u okviru ove tačke dnevnog reda.

U drugom krugu glasanja, s 23 glasa „za“ (iz Federacije BiH 21, iz Republike Srpske dva), 11 glasova „protiv“ i bez „suzdržanih“ glasova, Dom nije usvojio zaključak Kluba poslanika SDA.

Ad.19. Donošenje zaključka o izdvajanju jednodnevne zarade poslanika Predstavničkog doma iz mjeseca januara za pomoć građanima Haitija

Predsjedavajući je rekao da su svi poslanici dobili prijedlog zaključka Rifata Dolića. Nije bilo rasprave.

Predstavnički dom jednoglasno je, s 34 glasa „za“ (iz Federacije BiH 21, iz Republike Srpske 13), usvojio zaključak o izdvajanju jednodnevne zarade poslanika Predstavničkog doma iz mjeseca januara za pomoć građanima Haitija.“

Ad.20. Donošenje zaključaka o izdvajanju finansijskih sredstava za ublažavanje posljedica i otklanjanje šteta nastalih od poplava tokom mjeseca januara 2010.godine na teritoriji BiH

Predsjedavajući je, u uvodnim napomenama, rekao da su svi poslanici dobili prijedlog zaključaka Kolegija Predstavničkog doma koji glase:

1. Preporučuje se Vijeću ministara BiH da iz sredstava budžetske rezerve izdvoji 1.000.000,00 KM za ublažavanje posljedica i otklanjanje šteta nastalih od poplava tokom mjeseca januara 2010 godine na teritoriji BiH.
2. Pozivaju se poslanici u Predstavničkom domu i delegati u Domu naroda PSBiH da za iste namjene putem Izjave o odobrenju donacije izdvoje po ½ poslaničkog paušala za januar 2010. godine.
3. Izdvojena sredstva iz tač. 1. i 2. Vijeće ministara BiH doznačit će gradovima i općinama u BiH srazmjerno visini nastale štete na pojedinim područjima a na osnovu prikupljenih informacija nadležnih organa gradova i općina o procijenjenim štetama, najkasnije u roku od 60 dana.
4. O realizaciji ovih zaključaka potrebno je izvijestiti Predstavnički dom.
5. Preporučuje se nadležnim organima vlasti u entitetima, kantonima, gradovima i općinama da donesu slične odluke radi ublažavanja posljedica i šteta nastalih od poplava u januaru 2010. godine.

U raspravi je učestvovao Šemsudin Mehmedović.

Amandmane na prijedlog zaključka Kolegija Doma predložili su Momčilo Novaković, Slavko Jovičić i Šemsudin Mehmedović.

Dom se prvo izjašnjavao o amandmanima Momčila Novakovića koji glase:

„- U zaključku 2. riječi „1/2 poslaničkog paušala“ mijenjaju se riječima: „jednu dnevnicu“.

- Nakon zaključka 1. dodaje se novi zaključak koji glasi:
 - 1a) Pozivaju se ministri, zamjenici ministara u Vijeću ministara BiH, direktori direkcija i njihovi zamjenici, rukovodioci agencija i njihovi zamjenici (osnovanih na nivou Bosne i Hercegovine) da se uključe u ovu akciju i odvoje po jednu dnevnicu za namjene iz zaključka broj 1.“

„Za“ amandmane je glasalo 29 poslanika (iz Federacije BiH 17, iz Republike Srpske 12), jedan je glasao „protiv“ i jedan je bio „suzdržan“, te je Dom usvojio amandmane Momčila Novakovića.

Dom je, s 31 glasom „za“ (iz Federacije BiH 20, iz Republike Srpske 11), bez glasova „protiv“ i jednim „suzdržanim“ glasom, usvojio amandman Slavka Jovičića i Šemsudina Mehmedovića koji glasi:

„Predlažem da se u zaključke od 1. do 5. uvrsti i pomoć općinama koje su pogođene poplavama tokom 2009. godine i koje su iskazale štetu nastalu na svom području.“

Na kraju se Dom izjašnjavao o prijedlogu zaključaka Kolegija Doma sa usvojenim amandmanima, te je zaključak usvojen jednoglasno, s 33 glasa „za“ (iz Federacije BiH 20, iz Republike Srpske 13).

Ad.21. Izmjene u članstvu komisije Predstavničkog doma i zajedničke komisije oba doma:

- a) Lejla Klokić imenuje se za člana Zajedničke komisije za ljudska prava, prava djeteta, mlade, imigraciju, izbjeglice, azil i etiku i Komisije za vanjske poslove Predstavničkog doma, umjesto Sadika Ahmetovića kojem je prestao mandat imenovanjem na dužnost ministra sigurnosti BiH i zamjenika predsjedavajućeg Vijeća ministara BiH**

Nakon uvodnih napomena predsjedavajućeg, nije bilo rasprave o ovoj tački dnevnog reda.

„Za“ prijedlog izmjena glasalo je 29 poslanika (iz Federacije BiH 18, iz Republike Srpske 11), nijedan poslanik nije bio „protiv“, a dva poslanika bila su „suzdržana“, te je Dom imenovao Lejlu Klokić za člana Zajedničke komisije za ljudska prava, prava djeteta, mlade, imigraciju, izbjeglice, azil i etiku i Komisije za vanjske poslove Predstavničkog doma, umjesto Sadika Ahmetovića kojem je prestao mandat imenovanjem na dužnost ministra sigurnosti BiH i zamjenika predsjedavajućeg Vijeća ministara BiH.

Ad.22. Davanje saglasnosti za ratifikaciju:

- a) Sporazuma između Vijeća ministara Bosne i Hercegovine i Vlade Savezne Republike Njemačke o finansijskoj saradnji u 2008. godini,**
b) Revidiranog dopunskog sporazuma o pružanju tehničke pomoći od strane Međunarodne organizacije za atomsku energiju (IAEA) Bosni i Hercegovini,
c) Šestog dodatnog protokola na Ustav Svjetskog poštanskog saveza.

Predsjedavajući Milorad Živković podsjetio je da je nadležna Komisija za vanjske poslove dala pozitivno mišljenje o sporazumima, nakon čega nije bilo rasprave.

Dom je jednoglasno, s 33 glasa "za" (iz Federacije BiH 21, iz Republike Srpske 12), dao saglasnost za ratifikaciju Sporazuma između Vijeća ministara Bosne i Hercegovine i Vlade Savezne Republike Njemačke o finansijskoj saradnji u 2008. godini.

Zatim je jednoglasno, s 34 glasa „za“ (iz Federacije BiH 21, iz Republike Srpske 13), dao saglasnost za ratifikaciju Revidiranog dopunskog sporazuma o pružanju tehničke pomoći od strane Međunarodne organizacije za atomsku energiju (IAEA) Bosni i Hercegovini.

Također jednoglasno, s 32 glasa „za“ (iz Federacije BiH 20, iz Republike Srpske 12), Dom je dao saglasnost za ratifikaciju Šestog dodatnog protokola na Ustav Svjetskog poštanskog saveza.

Time je realiziran dnevni red.

Predsjedavajući je, na kraju sjednice, napomenuo da je 71. sjednica zakazana za 3. 2. 2010. Sjednica završena u 20,10 sati.

Sastavni dio Zapisnika je transkript 70. sjednice Predstavničkog doma.

SEKRETAR
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
dr. Milorad Živković